

BOSNA I HERCEGOVINA
FEDERACIJA BOSNE I HERCEGOVINE
TUZLANSKI KANTON
OPĆINSKI SUD U TUZLI
Broj: 32 0 St 451505 23 St
Tuzla, 02.04.2024. godine

OPĆINSKI SUD U TUZLI, sudija Vedran Milašinović razmatrajući prijedlog predlagača Grad Gradačac, stečajni dužnik „GRADAČAČKI SAJAM“ d.o.o. za priređivanje sajмова i izložbi Gradačac, ul. H.K. Gradašćevića bb, van ročišta donio je dana 02.04.2024. godine sljedeće:

R J E Š E N J E

JAVNO SE POZIVAJU predlagač, povjerioci i sva zainteresovana lica da u roku od 30 (trideset) dana od dana objavljivanja rješenja u Službenim novinama F BiH predlože otvaranje stečajnog postupka i na žiro-račun Suda, broj: 132-100-03091233-91 NLB banka dd Sarajevo, predujme iznos od 5.000,00 KM (pethiljadakonvertibilnihmaraka), na ime obezbjeđenja troškova stečajnog postupka, te da dokaz o izvršenoj uplati dostave sudu pozivom na broj predmeta.

Ukoliko stečajni dužnik kao predlagač ili neko od zainteresovanih lica ne uplati navedeni iznos predujma u ostavljenom roku uz dostavu dokaza o uplati sudu pozivom na broj predmeta, sud će o prijedlogu za otvaranje stečajnog postupka odlučiti u skladu sa odredbama Zakona o stečaju.

Rješenje će biti objavljeno u Službenim novinama F BiH, web stranci suda i oglasnoj ploči suda.

O b r a z l o ž e n j e

Sud je dana 05.01.2024. godine pokrenuo prethodni postupak radi utvrđivanja uslova za otvaranje stečajnog postupka nad imovinom privrednog društva „GRADAČAČKI SAJAM“ d.o.o. za priređivanje sajмова i izložbi Gradačac, ul. H.K. Gradašćevića bb, a za privremenog stečajnog upravnika imenovan je Senad Uzunić iz Tuzle. Dana 05.02.2024. godine privremeni stečajni upravnik je dostavio izvještaj o provedenom prethodnom postupku.

Iz izvještaja privremenog stečajnog upravnika i navoda datih na ročištu proizilazi da je djelatnost društva bila organizacija sajma pod nazivom Gradačački sajam šljive, te iznajmljivanje poslovnih prostora. Društvo je sa Općinom Gradačac ugovorilo zakup sportske hale 1996. godine, u kojoj ima više poslovnih prostora koje je stečajni dužnik davao u podzakup trećim licima (u pravilu sportskim klubovima i ugostiteljima), a jednom godišnje su u vlastitoj organizaciji pripremali i održavali sajam. Problemi u poslovanju su nastali tokom 2016. godine kada Grad Gradačac više nije htio da produži zakupni odnos te je podigao tužbu, a objekat sportska sala je 2021. godine predat u posjed Gradu Gradačac, a firma je zbog obustavljanja osnovne djelatnosti prekinula poslovanje. Kod društva su bili zaposleni radnici pretežno radi održavanja objekta i obavljanja ugostiteljskih djelatnosti, te je tokom 2020. godine bilo prijavljeno 8 radnika, koji su svi odjavljeni 2021. godine, prema kojima po navodima ovlaštenog lica nisu ostala dugovanja na ime plata i doprinosa, s tim da iz dostupne dokumentacije nije bilo moguće utvrditi za koji period su uplaćeni posljednji doprinosi. Prema poslovnim knjigama obaveze iznose 419.614,00 KM, od čega se iznos od 413.884,00 Km odnosi na obaveze prema dobavljačima, odnosno prema Gradu Gradačac za zakup poslovne hale za šta je Grad Gradačac podnio tužbu i ishodio presudu u svoju korist. Tačan iznos obaveza bi mogao biti utvrđen tek u slučaju otvaranja stečajnog postupka i podnošenja prijave potraživanja od strane stečajnih povjerilaca. Računi društva kod poslovnih banaka su ugašeni ili blokirani, društvo nije likvidno u kontinuitetu u posljednjih dvije godine. Društvo u svom vlasništvu nema nepokretnosti, pokretnih stvari, novčanih sredstava niti bilo koje druge imovine iz koje bi se mogli finansirati troškovi stečajnog postupka i namiriti povjerioci. U poslovnim knjigama društvo ima evidentirano potraživanja koja se u najvećem dijelu podnose na sportske klubove koji su iznajmljivali salu a nisu redovno plaćali najam, a naplata

nije bila moguća s obzirom da nisu imali imovine, tako da su navedena potraživanja u svakom slučaju i zastarila.

Stečajni dužnik a što proizilazi iz izvještaja i mišljenja privremenog stečajnog upravnika nije u roku od 60 dana od dana nastupanja platežne nesposobnosti podnio prijedlog za otvaranje stečajnog postupka, a prema finansijskim izvještajima nelikvidnost odnosno gubitak iznad visine kapitala je evidentiran na dan 31.12.2021. godine (a prijedlog je podnio stečajni povjerilac 29.08.2023. godine).

Sud ukazuje da su potraživanja Grada Gradačac prema dužniku, a koja su utvrđena pravosnažnim sudskim presudama dostavljenim uz prijedlog i tokom postupka, veća od dugovanja navedenih u poslovnim knjigama, tako da je samo na ime glavnog duga Gradu Gradačac pravosnažnim presudama dosuđen iznos od 597.256,00 KM, a uz koji su presudama dosuđivane i zakonske zatezne kamate.

Ispitujući prijedlog za pokretanje stečajnog postupka sud je utvrdio da je prijedlog za otvaranje stečajnog postupka dopušten i osnovan obzirom da je stečajni dužnik platežno nesposoban.

Cijeneći da su ispunjeni uslovi za otvaranje stečajnog postupka, a nakon provedenog prethodnog postupka i dostavljenog izvještaja privremenog stečajnog upravnika, te da je utvrđeno da stečajni dužnik nema imovine za podmirenje obaveza, sud je u smislu odredbe čl. 102 stav 7. Zakona o stečaju pozvao dužnika, povjerioci i sva zainteresovana lica da izvrši uplatu troškova finansiranja stečajnog postupka u visini od 5.000,00 KM iz kojih sredstava će biti finansirani svi troškovi stečajnog postupka (nagrada i naknada stečajnom upravniku, objavljivanje rješenja u službenim novinama, izrada pečata za društvo u stečaju, podnošenja finansijskih izvještaja nadležnim institucijama sve do postupka brisanja društva dužnika iz sudskog registra privrednih društava, procjena imovine odstrane ovlaštenih vještaka, objava oglasa za unovčenje imovine i drugo), obzirom da prema prijavi privremenog stečajnog upravnika društvo ne posjeduje imovinu.

Ukoliko predlagač, povjerioci ili neko od zainteresovanih lica u ostavljenom roku ne predlože otvaranje stečajnog postupka i izvrše uplatu predujma troškova za vođenje stečajnog postupka, sud će otvoriti stečajni postupak i odmah ga zaključiti u skladu sa odredbama člana 102.stav 8. Zakona o stečaju.

Odluka o dostavi rješenja i javnom oglašavanju putem oglasne ploče suda, WEB stranice Općinskog suda u Tuzli i javnog objavljivanja u Sl. Novina F BiH, zasniva se na odredbi člana 103. stav 8. Zakona o stečaju.

SUDIJA
Vedran Milašinović

POUKA O PRAVNOM LIJEKU: Protiv ovog rješenja nije dozvoljena žalba.